



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**27 Setembru 2018**

**Bankada Fretilin husu ba líder nasionál sira atu loke diálogu hodi bele hetan solusaun ba impase polítika atuál no tenke iha konsensu ba promove boa governasaun no kombate korrupsaun nomós konsidera urjente Lei Anti Korrupsaun**

Iha 25 Setembru 2018, Prezidente Bankada Fretilin, Distintu Deputadu Francisco Miranda Branco hato'o deklarasaun polítiku Fretilin nian iha sesaun plenaria. Deklarasaun polítika ne'e tau importánsia ba asuntu impase polítiku ne'ebé seidak hakotu to'o ohin lora no asuntu boa governasaun no kombate korrupsaun no urjénsia Lei Anti Korrupsaun. Fretilin deklara katak atu sai hosi impase polítika ne'e tenke iha diálogu entre líder sira nasaun nian, la'ós insulta malu no defama malu liuhosi média de'it. Enkuantu asuntu promove boa governasaun no kombate korrupsaun, Fretilin deklara katak presiza iha konsensu hosi parte hothotu no Lei Anti Korrupsaun konsidera urjente atu bele kombate ho efetivu korrupsaun iha Timor-Leste. Bankada opozisaun PD iha nia intervensaun liuhosi Distintu Deputadu Adriano do Nascimento sekunda deklarasaun polítika ne'e.

“JSMP apresia tebes sentidu Estadu no konsiénsia bankada opozisaun sira-nian hodi tau importánsia ba diálogu hodi buka solusaun ba impase polítika iha ita-nia rain nomós hodi tau iha priopriedade asuntu promosaun boa governasaun no kombate korrupsaun hodi konsidera urjente kriasaun Lei Anti Korrupsaun”, dehan Diretór Interinu JSMP, Casimiro dos Santos.

Bankada Fretilin konsidera diálogu mak esénsia demokrásia, se Timor-Leste hakarak duni hala'o demokrásia iha ita-nia moris hanesan nasaun, presiza iha diálogu. Diálogu loloos tenke hala'o iha klima boa vontade no kompriensaun ba malu hodi ikus mai bele hamosu entendimentu ida ne'ebé di'ak ba parte hotu. Karik laiha boa vontade no kompriensaun ba malu mak sei la iha diálogu hanesan agora akontese dadaun iha ita-nia rain. Se laiha diálogu, ita-nia dezentvolvimentu sei la la'o ba oin.

Deputadu ne'e hatutan tan katak ita labele kontinua nafatin iha situasaun ida ne'e hodi taka diálogu ba malu, hodi ko'alia de'it ba malu liuhusi média sira, hodi insulta malu, hodi hamosu tan konfuzaun, deskonfiansa, hodi la tau fiar ba malu.

Iha polítika ohin lora, bazeia de'it ba manipulasaun, lia bosok, defamasaun no kuda kultura ódiu vigansa pesoál. Ida ne'e mak kilat ne'ebé uza iha debate polítika iha ita-nia rain, hodi hamoris sosiedade ida ne'ebé la saudável iha relasionamentu umanu no relasionamentu polítiku.

Rua setubal, Colmera, Dili Timor Leste  
PoBox: 275

Telefone: 3323883 |77295795

[www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

To'o ona tempu ba líder polítiku sira atu tau aas interese povu no nasaun nian hosi interese ba an rasik.

Deputadu ne'e hatutan tan katak ita bele iha diferénsia opiniaun, maibé iha buat barak mak ita tenki iha konsensu mak hanesan boa governasaun, transparánsia ho luta kontra korrupsaun. Atu hetan konsensu ba polítika sira hanesan ne'e, ita presiza iha diálogu ne'ebé abertu, konstrutivu ba interese nasional, la'ós ba interese grupu ho interese pesoál. Tempu to'o ona ba ita-nia líder sira atu tur hamutuk hodi loke diálogu atu hakotu impase polítika ne'e para ita bele hateke ba oin hodi servi di'ak liu ita-nia povu.

Durante ne'e mós bankada Fretilin kontinua ezije kona-ba Lei Anti Korrupsaun. Deputadu ne'e hateten atu garante boa governasaun no dezvoltimentu, atu assegura dignidade no integridade Estado nian, Timor-Leste presiza urjentemente Lei Anti Korrupsaun ida forte no efetivu. Nia hatutan iha lejislatura ida ne'e Fretilin sei tau aas Lei Anti Korrupsaun nu'udar prióridade atu prevene no kombate. Nune'e Fretilin sei halo esforsu hotu-hotu atu hetan lalais aprovasaun iha Parlamentu Nasionál kona-ba lei ida ne'e.

Reprezentate povu ne'e mós nafatin fó hanoin ba deputadu sira hotu iha Lejislatura V katak tenki muda prátika sira hanesan ne'e tanba Konstituisaun no lei klaru tebes. Sé de'it mak hetan akuzasaun definitivu ka komete krime ne'ebé bele hamonu kondensasaun ho kastigu aas liu tinan 2, ema ne'e sei lakon automatikamente ninia imunidade. Maibé Parlamentu Nasionál sempre hola medida atu viola artigu ida ne'e.

Proposta Lei Anti Korrupsaun apresenta uluk iha tinan 2014, maibé ate agora seidak hatún ba plenária atu halo deliberasaun. Fretilin fiar katak agora mak tempu ne'ebé oportunu atu passa lalais lei ida ne'e.

Bankada Fretilin mós konsidera korrupsaun iha setór públiku mak kontinua satan Timor-Leste nia dezvoltimentu. Maibé Timor Leste seidak iha medida ruma ne'ebé adekuaudu atu responde ba dezafiu ida ne'e, tanba ne'e Lei Anti Korrupsaun nu'udar pasu ida importante tebes atu hahú luta ida ne'e, atu kombate korrupsaun, assegura boa governasaun no garante bem-estar ba povu tomak.

JSMP mós observa katak Parlamentu Nasionál durante ne'e agenda ona eleisaun ba Komissáriu Komisaun Anti Korrupsaun (KAK) iha agenda período *ordem do dia* durante ne'e maibé to'o agora seidak realiza.

Atividade ne'e hetan apoiu hosi Governu Austrália liuhosi Embaixada Austrália iha Timor-Leste

Atu hetan informasaun liutan favor kontaktu direktamente:

Casimiro dos Santos

Diretór Interino JSMP

Diresaun e-mail: [santos.cas76@gmail.com](mailto:santos.cas76@gmail.com)

Telefone: 3323883